



Kyk dan so vir die loslit-TV-aanbieder en sanger **Pieter Koen!** SARIE se sosiale en stylredakteur, **Fanie Cronjé**, het hom onder hande geneem

Koel in 'n rugbytrui – maar maak seker dis die modieuse soort!

Ons keer ál meer
terug na opdress.
Belê solank in 'n
goedgesnyde pak en
'n das, Meneer.

Koen SE BESTE SKOEN

foto's PHYLLIS GREEN stilering en teks FANIE CRONJÉ
grimering HEIDI GOUWS hare LISA VAN TANAZ

Pak en das Strellson Hemp Edgars Skoene Stuttafords



'n Hemp met ruitpatrone,
jeans en 'n toerits-trui en jy is
reg vir elke geleentheid.

Broek en hemp Banana Republic Gebreide toerits-top Tommy Hilfiger – alles by Stuttafords

T

oeganklik, aangenaam, bekkig . . . dis Pieter Koen, sanger en veld-aanbieder van *Kwêla* op kykNET. Maar hedendaagse styl?

Wel, dit het dalk so effens gestagneer of agterweë gebly die afgelope paar jaar. Pieter sê half verskonend oor sy blonde ligstrepe en *spikes*: “Ek het dan gedink dis in?”

My mening: Geleurde hare vir mans is taboe.

Toe Pieter tot ’n oormak-sessie instem, was ’n nuwe haarstyl dadelik die eerste stap. Makliker as wat ons gedink het, in samewerking met Tanaz-haarsalon in Johannesburg en Lisa Levin, ’n talentvolle en ervare haarkapper.

Ons moes wel Pieter se hare kleur om dit so na as moontlik aan sy natuurlike skakering te kry en om van die strepe ontslae te raak.

Kort hare met ligstrepe kan die gevreesde *leopard print*-kolle op jou kop maak. Ons kon dit duidelik sien terwyl Pieter se *spikes* op die ritme van die skêr se lemme vloer toe val.

“Ek’s nie mooi nie, maar ek’s maklik,” sê hy (terwyl baie vroue van hom sal verskil oor die mooi). “Toe my haarkapper destyds

sê ons moet die strepe insit, het ek gedink: Hoekom nie? Daarna het ek in ’n gemaksone beland met my hare. Mans kan mos oudmodies en eiewys wees. Dís hoekom ons nie altyd genoeg aandag gee aan hoe ons lyk nie,” verduidelik Pieter.

‘Mans kan oudmodies en eiewys wees. Dis hoekom ons nie altyd genoeg aandag gee aan hoe ons lyk nie’

Pieter Koen, sanger en TV-aanbieder



Insteekskoene is in, maar nie dik sole nie. En rubbersole is “onvergeeflik”.

Ons klein veranderings aan sy klerestyl het ook ’n drastiese impak gemaak. In die verlede het Pieter soos ’n student aangetrek. Nou was dit tyd vir groter sofistikasie!

Pieter is self beïndruk.

“’n Verandering is mos so goed soos ’n vakansie. Mense het die verandering dadelik raakgesien. Ek hou veral van my kort hare. Ek sal dit nie weer in die ou styl dra nie. So ’n oormak-sessie maak ’n reuse-verskil, nie net vir die mense om jou nie, maar vir jouself.”

Dis eintlik eenvoudig. Mansmodes is presies wat dit sê: manlik. Geruite materiaal, khaki en denim is in die kol – jy moet dit net reg drá. Waag so ’n bietjie, veral as jy weet hóé!

1 Hande in die hare

Netjies gesnyde hare aan die kante en agter, of korter geskeer (soos die sokkerster David Beckham s’n), of langer hare wat natuurlik maar manlik lyk, is die groot tendens. Lang hare word verkieslik met ’n baard (’n paar dae oud) gedra – dink aan die rugbyspeler Victor Matfield. Dit sal >

< jou manlik en *rugged* laat lyk.

Effens langer hare wat vorentoe en opwaarts gestyleer word, is ook gewild, maar dan verkieslik vir jonger mans. Bly weg van haarkleur, want min mans kry dit reg. Word eerder stylvol grys – dit sal jou “gedistingeerd” laat lyk. Penne-hare (*spikes*) is nie aanvaarbaar nie, tensy jy nege jaar oud is of jou naam Bart Simpson is.

2 Steek in daai hemp ... of nie?

Hemde met knope en veral met ruitpatrone word al hoe meer die eerste keuse vir mansdrag.

En wanneer steek jy jou hemp in jou broek en wanneer nie? Gelukkig is die besluit klaar vir jou geneem. 'n Uitgesnyde ronding aan die onderkant van jou hemp beteken steek in. Reguit gesny is vir uithang.

Gholfhemde en T-hemde is steeds mode. Jou T-hemp moet by jou persoonlikheid en jou beroep pas. En nie te klein nie, maar veral ook nie te groot nie – anders lyk dit slordig en sakkerig.

3 Drá die broek

Denim-jeans is altyd in die kol. Denim is die materiaal en jean die styl. Onthou, jy kry ook koordferweel-jeans.

Die geheim van jeans lê in die versorging en snit. Koop jou denim-jeans altyd 'n nommer te klein – ja,

regtig! As jy dit aanpas, moet dit effens ongemaklik sit. Denim rek maklik en hang dan sakkerig en vormloos. Dra dit eers 'n dag of wat tuis vóór jy daarmee uitgaan.

Dop jou jeans om en was dit apart in koue water, sonder versagmiddel, net so elke tweede keer dat jy dit aangehad het. Hang dit omgedop oor die wasgoedlyn. Geen tuimeldroog of stryk nie.

Chinos en kakiebroeke lyk baie goed. Vermy net plooië aan die bokant en opslaanpype. Dis oudmodies en onvleiend.

4 Gecollar en getie

'n Goedgesnyde pak is 'n belegging. Jy gaan dit vir 'n lang tyd kan dra. Dis nie soos 'n rok vir 'n vrou nie – niemand sal weet as jy dit weer en weer aantrek nie. Nog 'n bonus: Jy kan die baadjie en die broek afsonderlik dra. Hou jou keuse klassiek. Die baadjie moet verkieslik een of twee knope hê. 'n Swart of donker-vlootblou (*navy*) baadjie of een met dun potloodstrepe is altyd in die mode.

Min mans dra deesdae dasse, maar dit gaan verander! Ons keer al meer terug na opdress. 'n Dun of mediumbreed swart das is “in” en lyk goed by 'n wit of selfs geruite hemp. Blou op blou is gróót, byvoorbeeld 'n vlootblou baadjie, knalblou hemp en inkleur das. Eksperimenteer met kleur, veral as jy jonger is. Moet nooit 'n das

by 'n kortmouhemp dra nie, tensy jy regtig wéét wat jy doen.

Om te toets of jou hemsboordjie groot genoeg is, druk jou vinger tussen die kraag en jou nek in. As jy nie jou vinger kan inkry nie, is dit te klein. As hy te maklik ingaan, is dit te groot.

As jy nie 'n das dra nie, steek jou hemsdraag by jou baadjie, trui of pak in. Brad Pitt het goed gelyk toe hy sy kraag by sy pak klere laat uitsteek het – 15 jaar gelede! Ek gee nie om of jy trou, doop of skei nie, jy doen dit nie.

5 Trek die stoute skoene aan

Dik rubbersole is onvergeeflik. Smyt dit weg. Tekkies is in en swart blinkleer-toerygskoene of insteekskoene (*slip ons*) is baie in, met of sonder sokkies. Stewels: 'n moet, op jou enkels of hoër. Maar pasop weer vir dik sole. Vellies, *brogues*, plakkies, sandale en seemanskoene is in die mode.

6 Voltooi die prentjie

'n Dikraambril, truie, rugbytruie (die modieuse universiteit-soort, nie jou Bloubul-trui nie), *trench coats*, jasse, baadjies, serpe, kepse, hoede en sakke is almal items wat jou sal laat goed lyk.

Nou's jy aangetrek. En pas jousself op sodat jy mooi lyk saam met die vrou aan jou sy!

foto's geneem by ALPINE ATTITUDE BOETIEKHOTEL EN KONFERENSIESENTRUM,
012 348 6504, www.alpineattitude.co.za



Lisa aan die werk – knipknip verdwyn die spikes.



Kyk, só word dit gedoen, beduie Fanie.



Phyllis maak gereed om die eindresultaat af te neem.



Is dit jy, Pa? vra Pieter se seuntjie, Jovan.



Gaan kuier op sarie.com agter die skerms van ons oormoed-sessie.